

VISION
MASTERPLAN 
Gröden Gherdëina Gardena

Vision Gherdëina

Indesc

INDESC	2
PAROLES DANORA	4
PERT I L STRUMËNT DL MASTER PLAN	6
1 A CIE JOA PA L MASTER PLAN?	7
2 SVILUP DL MASTER PLAN	9
2.1 Gestion dl proiet	9
2.2 Fases de lëur	9
2.3 Grupes de lëur tematices	10
2.4 Forum Gherdëina	11
2.5 Atuazion dl master plan	13
3 CUNTENUC DL MASTER PLAN	15
PERT II VISION 2050+	17
PERT III CUNTRAT PER L DAUNÌ MASTER PLAN GHERDËINA	19
NA GHERDËINA UNICA	20
Unifiché teritorialmënter la valeda de Gherdëina	21
Miuré la cualità dla vita	24
Mantenì la cuntreda naturela	27
Garanti l balanz soziel	30

N raion da jì cun i schi de cualità	32
VARIETÀ TE GHERDËINA	34
Cualità mpede cuantità	35
Funtanes d'energia auternatives	38
PUECH TRAFICH TE GHERDËINA	40
Smendramënt dl trafich	41
Urganisé l trafich a na maniera ecocumpatibla	43
PERT IV MASTER PLAN	46
4 NA GHERDËINA UNICA	FEHLER! TEXTMARKE NICHT DEFINIERT.
5 VARIETÀ TE GHERDËINA	FEHLER! TEXTMARKE NICHT DEFINIERT.
6 PUECH TRAFICH TE GHERDËINA	FEHLER! TEXTMARKE NICHT DEFINIERT.

Paroles danora

Gherdëina ie la valeda plu cunesciuda dl Südtirol y un di travers de majer prestige te dut l raion dl'Elpes. Si posizion iust t'amesa l raion dla Dolomites, detlarà dal'UNESCO Patrimone naturel dla Umanità, la bela cuntredes y si carateristiches cultureles fej ora la faszinazion y l'atraxion particulera de chësta valeda. Chësc cumporta n sfrutamënt turistic ntensif cun na criazion de valor njuntà senificativa propi te chësc setor economic.

L svilup teritorial te Gherdëina depënd dala cundizions tipiches de na valeda da mont. Sperses adatedes per nridlamënc permanënc ie mé da garat te na mesura scialdi limiteda. La majera pert dla funzioms liedes al'ativiteies da uni di (residënza, lëur, trafich y nsci inant) ie cunzentreda sun l fonz dla val ulache l se porta nsci pro na coejistënza de sortes defrëntes d'adurvanza dl terac che ie datrai nce n cunflit la una cun l'otra. L'ativiteies dla persones lascia for n sèni sun l teritore: nosta maniera de frabiché, de se muever da n luech al auter y de passé nosc tēmp liede muda nosc luesc y la cuntredes.

I periculi che nasc dainora vën recunesciui for plu nce dai chemuns locai. L dejidere de ruvé a n balanz sustenibl danter i bujëns di abitanc, l ambient naturel y la esigënzes economiches avanea. L duvier dla planificazion teritoriela ie chël de ruvé a n'acurdanza danter i bujëns liei al'adurvanzes defrëntes dl terac (abitatif, de lëur, de scuneda, recreiatif) y la fazions che chisc gauja, a na moda da garantì l balanz che ie debujën.

La fazions dl svilup teritorial y de nosta azions ne se fërma nia pra i cunfins aministratifs. Perchël ne ie l svilup de Gherdëina nia mé de cumpetënza de un n Chemun dassëul, ma de duc i cin Chemuns adum. Per chësta rejon à de lugio dl 2008 i Chemuns de Gherdëina de Sëlva, Santa Cristina, Urtijëi, Ciastel (frazions ladines) y Laion unificà si forzes per svilupé, cun l sustëni dl Ufize Planificazion teritoriela dla Provinzia autonoma de Bulsan - Südtirol, na strategia per proieté deberieda l dauni de Gherdëina ti dejeneies che vën.

L ne ie nia l prim iede che i Chemuns de Gherdëina se mët adum per planifiché deberieda si dauni. Bele dan diesc ani iel unit metù a jì la scumenciadiva "Gherdëina 2005" a chëla che ulon ncuei nes cunlië. Ma cun chësc master plan uelen fé zeche deplù y purté adum nosc proiec n cumenanza y i cuntenuc svilupe te na forma che sibe giuridicamënter lienta per duc. I strumënc de planificazion che on abù a despusizion nchin sën ne ie pervia de si puecia flessibltà nia drë adatei per la desfidedes che na planificazion sëuracumenela y multidisziplinera se damanda. La lege provinziela sun la planificazion teritoriela dà perchël ai Chemuns dl

Südtirol la puscibltà de lauré ora n plan strategich sëuracumenel che à l obietif de reprejenté l svilup teritorial de de plu Chemuns tl daunì. De chësc viers ie Gherdëina n model te dut l Südtirol: nchina ncuei ie chësc l sëul plan general (master plan) sëuracumenel che ie unit realisà.

Pert I L strumënt dl master plan

1 A cie joa pa l master plan?

L master plan Gherdëina ie unit laurà ora per i residënc y i utënc de Gherdëina; si cuntenuc ie unic definei dai abitanc dla valeda. L plan dëssa formulé na strategia n cumenanza, coerënta, de ududa longia y a tëmponch per n svilup teritorial, economich y soziel che sibe bon de ti pité ala jënt de Gherdëina mesuns de sustentamënt che dure nce tl dauni.

L master plan Gherdëina dessënia n cheder dl dauni dla valeda. Per i chemuns reprejenteiel n strumënt de planificazion a tëmponch y l determina ciuni che ie i obietifs a chëi che l svilup teritorial cialerà de miré ti ani che vën y che n messerà arjonjer deberieda tl dauni. L plan ativea la potenzialiteies locales y catalisea la forzes de duc i atëures nteressei a na moda da les nuzé per arjonjer i obietifs metui dant. L sustën la sinergies danter i Chemuns a na moda da ndrezé via deberieda si svilup per pudëi defënder l plu puscibl la ressurses y les nuzé a na maniera pusciblmënter sustenibla. De gra ala culaborazion danter i Chemuns puderà l'ativiteies de planificazion dejëutes nchin sën da uniun d'ëi autonomamënter uni purtedes adum y coordinedes, sibe verticalmënter (danter i livei defrënc de planificazion), sibe urizontalmënter (danter i Chemuns) a na moda che les ébe plu fazion. L master plan realisea a chësta maniera na planificazion teritoriela plu efizienta te duta la valeda. Udan danora la cooperazion danter duc i cin Chemuns cun la partezipazion dla istituzions cumpetëntes, reprejentea l master plan n prim var de viers de n svilup dla valeda caraterisà da na coejion teritoriela y soziela.

L master plan, ntendù coche strumënt, à chisc obietifs:

- Nterazion danter la pertes singules de n sistem, a na maniera sëuracumenela, multidisziplinera y a de plu livei
- Cunvergënza dla maniera d'afрутé l'ativiteies de planificazion locales danter i Chemuns nteressei
- Coerënza danter i obietifs n cumenanza y la dezijions ndividuales a nivel local
- Criatività tla soluzions nueves: ressolver i problems de duc nce a na maniera nia cunvenziunela
- Comunicazion, partezipazion y co-dezijion de duc i Chemuns, i zitadins/la zitadines y la istituzions per l bën de duc

- **Cun l master plan devënta la planificazion teritoriela n strumënt cun chël che n ie boni de ti dé na forma ala lerch y de mëter a jì azions a na maniera propositiva mpede se limité a reagì tl mumënt de na situazion che se à purtà pro.**

L master plan à, da una na pert, la funzion de n strumënt d'orientamënt per l dauni per duc i sogec tuchei, dal'otra pert iel n strumënt giuridicamënter lient per la planificazion teritoriela sëuracumenela. Dal pont d'ududa di cuntenuc y dla prezijion dl detail iel nluegià danter l Plan provinziel de svilup y de coordinamënt teritorial (LEROP) y i plans urbanistics. Dl LEROP à la planificazion a tēmp lonch y la maniera nterdisziplinera y sëuracumenela de ti jì permez ala materia. Ma tl medemo mumënt iel n strumënt che possa unì adurvà dai Chemuns per si ativateies de planificazion. Danter si carateristiches lecurdons:

- L master plan ie n strumënt de planificazion che mira a obietifs a tēmp lonch, cun n urizont che tòl ite da doi a cater dejeneies. Ora che l'azions a tēmp curt y mesan, formuleiel nsci nce i obietifs a tēmp lonch, i nluagian geograficamënter cun la ntenzion de stabili, dlongia normes spezifiches, nce opzions de svilup per l dauni, les tenian daviertes sce les semea vester de utl. L master plan reporta nsci na "vision" per l dauni, l schiza l cheder dla situazion dejidreda y fej la prupostes dla opzions defrēntes per trasfurmé chësc dejidere tla realtà.
- Dal pont d'ududa teritorial, ne fej l master plan nia referimënt a n Chemun singul, ma a sperses cunliedes funzionalmënter. Chësta sperses ie caraterisedes da cërta cundizions geografiches omogenees (p.ej: nluegiamënt dlongia n ruf, te n gran raion metropolitan, o, sciche tl cajo de Gherdëina, te na valeda sëula) o cunliamēnc funziunei (p.ej.: fenomenns dl trafich lià dl lèur, flusc de trafich, nfluenzes cultureles y nsci inant).
- L master plan trata tematices y cuntenuc che à fazions sëura i Chemuns singui ora, y afruntea chël svilup che ne se fërma nia pra i cunfins aministratifs y che possa vester de vantaje per duta la valeda. Danter la tematices: na politica di nridlamēnc sëuraordinada y purteda inant deberieda, infrastructures n cumenanza, svilup di trasporc y valorisazion dla medema identiteies. Tl plan vëniel formulà prinzipls per duc che possa te n segundo mumënt unì detlinei a livel local tl cheder dla definizion dl plan urbanistich d'uni Chemun. L master plan ie n strumënt de planificazion interdisziplinier.

Cun l "Master Plan Gherdëina" cèlen per l prim iede de realisé n plan de chësta sort te n raion omogenn, y l ie nsci n proiet pilot destinà a reprejenté n ejēmpl per l'ativateies de planificazion dl dauni ti Chemuns dl Südtirol. Tl medemo mumënt ie l Plan da ntēnder nce coche mesun de n pruzes de aprendimënt per duc i sogec nteressei.

2 Svilup dl Master Plan

2.1 *Gestion dl proiet*

Per l'atuazion dl proiet iel unit metù su na “grupa de gestion” nciarieda a lauré ora l master plan dal pont d’ududa di cuntenuc y dl’organizacion sciche nce de stabili – adum cun duta la pertes nteressedes – da iede a iede la fases de lëur singules. Dla grupa de gestion fajovel pert i cin ambolc di Chemuns nteressei, te vel mumënc tlé i Assessëures provinziei dla repartizions tuchedes, sciche nce reprejentanc y reprejentes dl Ufize planificazion teritoriela dla Provinzia y dl’EURAC. Ntan l’elaborazion dl Plan se à la grupa ancuntà de norma n iede al mëns.

Al’Academia Europeaica de Bulsan, EURAC research, ti iel unit sëurandat la ncèria de coordiné l proiet, sciche nce de monitoré la fases defrëntes dl lëur y si esecuzion, de moderé l pruzes y d’abiné adum i resultat. Chësta ativeies udova danora na consultazion strënta danter i Chemuns y la Provinzia.

2.2 *Fases de lëur*

L Master Plan Gherdëina ie unit lauré ora danter lugio dl 2008 y auril dl 2010. Si elaborazion ie unida fata te cater fases defrëntes, aldò de na prugrescion logica di cuntenuc. Ora che i reprejentanc politics y aministratifs àl tëut pert al’elaborazion n cënt persones di cin Chemuns dla valeda, n reprejentaanza de grupes defrëntes dla popolazion sciche nce de lies y purtadëures de nteres.

- Te na prima fasa iel unit analisà y valutà l svilup passà y la situazion de fat te Gherdëina. L ejam à revardà, per ejëmpl, l andamënt demografich y economic, l’evoluzion di nridlimënc, dl trafich y dla cuntreda y l tiejà soziel dla valeda.
- Dadedò ie i resultat de chësta analisa unic purtei a descuscion tl cheder de cin grupes de lëur tematices cun esperc y espertes di Chemuns, che à ndividuà n basa al’analisa la desfidedes dl dauni y i obietifs de svilup teritorial per Gherdëina.
- Te na terza fasa ie chisc obietifs unic presentei a n publich plu ampl tl cheder de doi forums che ti à dat ai nteressei defrënc, ala lies y ala grupes locales la puscibltà de valuté i cuntenuc lauri ora y de tò posizion lessù.
- L ultim modul ie unit dedicà ala revijion di obietifs y dl’azions tla lum dla valutazions che ie unides ora n ucajian di forums, a i mudé sce debujën, y a cialé che i vënie eventualmënter adatei per l’elaborazion dl master plan nstës.

2.3 Grupes de lëur tematices

La grupes de lëur à scumencià a lauré tl scumenciamënt dl 2009 cun ativateies propedeutiches a nivel tecnich che à pona furmà la basa de descuscion per d'autri atëures. Dal scumenciamënt dl ann nchin ala fin de mei dl 2009 se à la grupes de lëur ancuntà neuf iedesc per afrunté chësta cuestions:

- Valuté la potenzialiteies y la problematiches dl mumënt (Cie va pa bën / cie ne va pa nia bën te Gherdëina?)
- Definé na vijion per l daunì y l'alternatives cunliedes (Cie uel pa la jënt? Co uelela pa viver, lauré, passé si tēmp liede y nsci inant?)
- Fissé obietifs tres chëi che l ie puscibl realisé la vijion metuda dant
- Identifiché la mesures tres chëles che n possa arjonjer i obietifs

Tl scumenciamënt se à la grupes de lëur ancuntà te sentedes a pert, dedichedes a tematices defrëntes. N iede che i obietifs fova pona unic definii ie la grupes de lëur depierpul unides purtedes adum y de mei dl 2009 ie i resultat de chësta fasa de lëur unic abinei adum te na reunion cuntlujiva, pra chëla che la grupes de lëur à svilupa per si cont i cuntenuc dl master plan. Ntan chësta ultima ancunteda iel unit fat prupostes de obietifs y ntervenc per l svilup de Gherdëina tl daun. Chisc obietifs ie resumei te chisc trëi ponc:

- Na Gherdëina unica
- Varietà te Gherdëina
- Puech trafich te Gherdëina

La maniera d'afrunté la cosses a nivel sëuracumenel y tenian cont de duc i setores defrēnc tl master plan à cumpurtà cuestions scialdi cumplesses y descuscions datrai sfadiëuses tla grupes de lëur nstësses. Perchël àn ala fin dl'ativateies tla grupa, a una cun duc i partezipanc dla grupa nstëssa stabili cërta prioriteies. Danter duc i obietifs purtei dant y la mesures ndividuedes iel nsci unit identificà i ntervenc che, aldò di tecnics presēnc tla grupes de lëur, se damanda la majera prëscia d'atuazion. Belau duc i obietifs y ntervenc tlo repurtei y purtei a descuscion ie unic apurvei a una dai partezipanc dla grupes de lëur.

N ie pona passei a strutturé i obietifs y ntervenc purtei dant y a lauré ora la prima prupostes y ejēmpli de coche i cuntenuc ëssa pudù unì reprejentei cartograficamēnter. Na prima proa ie unida prejenteda ai 1 de

setëmbër dl 2009 ala grupa pilot, che à purtà a esprescion n giudize n gran pert positif. Sun chësta basa à nsci ulù nvië via la descuscion cun i purtadëures de nteres dla valeda plu mpurtanc.

2.4 Forum Gherdëina

Ala fin dl 2009 iel unit urganisà doi forums te Sëlva per nformé la pertes nteressedes y la lies locales sun i cuntenuc svilupej nchin te chël mumënt tl master plan, per nvië y ncurajé duc i sogec a purté a esprescion si minonga y ponc d'ududa y per nriescer si valutazions di obietifs y dla mesures.

"Vi invitiamo a discutere con noi il futuro della nostra Valle ed a contribuire al suo sviluppo con le vostre opinioni. Il "master plan Gherdëina" è una strategia comune e deve offrire eguali opportunità future ai residenti, alle imprese e agli ospiti di tutti e cinque i Comuni".

"Vo duc sëis nvië a rujené cun nëus sun l daunì de nosta valeda. Vosta minonga ie de mpurtanza per l svilup de duc i 5 Chemuns. L "maste rplan Gherdëina" ie na strategia de duc adum y dëssa pité tl daunì la medema puscibilitëies de svilup ala jënt dl post, ala jënt che vën da ora de cà, a duc i setores dl' economia."

„Wir laden Sie ein, mit uns die Zukunft unseres Tales zu diskutieren und mit Ihrer Stellungnahme einen Beitrag zur Entwicklung zu leisten. Der „Masterplan Gröden“ ist eine gemeinsame Strategie und soll gleichwertige Zukunftschancen für Einwohner, Unternehmer und Gäste aller fünf Gemeinden bieten.“

L prim forum dassova nformé la urganisazions defrëntes sun i resultat ntermesans arjonc y dé la puscibltà de fé dumandes sun i cuntenuc y l pruzes. Tl cheder de chësta manifestazion iel nce unit urganisà n pitl workshop ntan chël che i partzipanc ie unic nviëi a tlassifiché i obietifs y la mesures n basa a si fazion y realisabltà. La nformazions dates y la descuscion che se à purtà pro ti à pità ala urganisazions na basa de partënza sun chëla che les pudova svilupé dadedò te si sëntes n arat detalià sun i cuntenuc dl master plan. Chësc arat ti ie pona unit mandà al'EURAC per scrit y prejentà ai partezipanc ntan l segundo forum. A chësta moda ie i obietifs y la mesures unic sometui a n pruzes de valutazion che à crià uni sort d'argumentazions che ie ala fin unides tëutes su tl master plan.

Pra tramedoi forums iel unit nvià i cumëmbri de chësta urganisazions, associazions y lies:

- Repartizion Mubiltà dla Provinzia autonoma de Bulsan
- Repartizion Natura y cuntreda dla Provinzia autonoma de Bulsan
- Repartizion Infrastrutures dla Provinzia autonoma de Bulsan
- Repartizion [Cultura y Ntendëza ladina](#) dla Provinzia autonoma de Bulsan
- Ufize Turism y alpinism dla Provinzia autonoma de Bulsan
- Sezion Gherdëina dl *Alpenverein Südtirol*
- Caritas
- Dolomiti Superski
- Studafuech ulenteres di cin Chemuns
- Stazion furestela Gherdëina
- Reprejentanc de Gherdëina dl'Assoziation di profescionisc liedesc dl Südtirol (VSF)
- Galeria d'ert Unika
- Ambolc di cin Chemuns
- Gherdëina Art
- Sëurastanc locai dla Union cumerz turism servijes dl Südtirol (*Handels- und Dienstleistungsverband Südtirol* - HDS)
- Lia per la defendura dla usanzas y l'quant dala Gherdëina "*Heimspflege- und Trachtenverein*" Sëlva
- Union per la defendura dla tradizions y usanzas dl Südtirol "*Heimpflegeverband Südtirol*"
- Assoziation per la defendura dla usanzas "*Heimpflegeverein*" Scilier
- Sëurastanc locai dla Union di hotelieres y eserzënc publics dl Südtirol (*Hoteliers- und Gastwirteverband* - HGTV)
- Referënc culturei di cin Chemuns

- Scola d’Ert Gherdëina
- Grupes locales dla Lia catolica di lauranc (*Katholischer Verband der Werktätigen - KVW*)
- Lia per Natura y Usanzes
- Sëurastanc locai dla Lia provinziela per l artejanat (*Landesverband der Handwerker*)
- Museum Gherdëina
- Saslong Classic Club
- Sëurastanc locali dla Lia di Paures dl Südtirol (*Südtiroler Bauernbund*)
- Sezion CAI de Gherdëina
- Skiclub Gherdëina
- Lia di maestri de schi
- SMG Destination Management Gherdëina
- Referënc per l sport di Chemuns
- Lies turistiche di Chemuns
- Union di Ladins de Gherdëina
- Istitut per l frabiché soziel dla Provinzia autonoma de Bulsan (IPES)

2.5 Atuazion dl master plan

L Master Plan Gherdëina dà dant linies diretives tleres de chèles che i Chemuns messerà tenì cont pra si dezijons tl dauni. L ne veij nia danora regules stares y fisses, ma l dà dant n cheder d’orientamënt y d’azion che puderà unì adatà cun l passé dl tèmp al mudamënt dla cundizions genereles. A chësta maniera tramudel te obietifs la cunescënzes che i Chemuns se fej ntan si lëur y adatea nce for inò: chèsc ie dantaldut de utl per mené inant l’ativiteies y sauridé la realizazion dla vision complessiva.

La “vision” formulada tl master plan, cun si orientamënc y obietifs, vel per n tèmp lonch. Ala fin d’uni mandat de legislatura messerà i Chemuns valuté i resultat di pruvedimënc tëuc tl cheder dla “sotstrategies” che porta a realisé la vision. N basa a chësta valutazion puderà i Chemuns tl scumenciamënt de na legislatura nueva adaté la sotstrategies singules al cuntest y ala cunescënzes nueves. La mudazions messerà

Vision Gherdëina

pona inò unì apurvedes da pert de duc i cin Chemuns de Gherdëina deberieda. A chësta moda ne ie l master plan te si forma atuela nia da ntënder coche n pont de travert dla planificazion, ma coche n pont de partënza de n pruzes de proietazion custant y durëivl.

La realizazion dla “sotstrategies” dl master plan se svilupea te tèmps defrënc. I tèmps de realizazion dla strategies defrëntes ie marchedes cun chisc culëures:



Ncuei: 2012 – 2016



Tëmp lonch: 2023 – 2040



Duman: 2017 – 2022



Validità nia limiteda

3 Cuntenuc dl master plan

I cuntenuc dl master plan lauri ora dala grupes de lëur y prejentei n ucajian dl forum Gherdëina reprejentea la strategies dl plan, ma nce la prioriteies che, dal pont d'ududa di atëures locai, toca da uni afruntedes dant, ajache les reverda i setores che ie tl mumënt plu problematic. Sëura dut sta pona la "vision 2050+", che reprejentea l obietif global per l svilup de Gherdëina.

Ntan la descuscions y l pruzes d'elaborazion ie dala vision generela unic ala lum trëi ponc zentrei (linies directives) che reprejentea i trëi azësc prinzipiei per ti jì permez al svilup dl dauni:

- Na Gherdëina unica
- Varietà te Gherdëina
- Puech trafich te Gherdëina

Te chisc trëi ponc iel cuntènì i obietifs de svilup dl dauni ndividuei dai atëures locai. I reprejentea la tematchedes ratedes de mpurtanza per l dauni y forma nsci n cheder de valores de referimënt per l svilup pruspetà. La ncëria sëurandata ai respunsabli locai dla planificazion ie da una na pert chëla de teni cont te si proiec dla finaliteies y dla strategies assoziedes a chësta linies directives; dal'otra pert ie la ntenzion nce chëla de jì sëura chësta strategies ora per lië la linies directives formuledes a na sort de "logica globala d'azion" per chi che töl la dezijions a nivel local. I proiec dl dauni messerà respeté i obietifs formulei.

Ti capituli che vën tlo dedò uniral ilustrà la linies directives y si mpurtanza per Gherdëina. I capituli scumëncia cun na descrizion curta dla di ponc zentrei. L unirà pona prejentà i obietifs cunliei cun uniu de chisc ponc cun na descrizion dl urientamënt che n se mbincia per l svilup teritorial. L unirà pona repurtà na lista de sotstrategies per la planificazion di obietifs da realisé a tëmp curt, mesan y lonch. Tres la realizazion de chisc traversc ne saral nia mé puscibl avëi na majera coerënza teritoriela, ma l sarà nce puscibl scemplifiché l pruzes de dezijion dl'administracions locales.

Ntan la preparazion dl master plan iel unit tëtù n cunscidrazion y purtà dant na lingia de ideies, proiec y ativateies che à da nfé cun la tematches plu defrëntes y destinèdes ai atëures y ala grupes plu defrëntes. Purempò, mët l master plan, coche strumënt de planificazion teritoriela, l azënt sun la sotstrategies che possa uni realisedes cun mesuns y strumënc tipics dl'ativateies de planificazion. Na cundizion per la sotstrategies dl master plan ie perchël n at ufizel di Chemuns de Gherdëina, cun d'otra paroles: la sotstrategies vën realisedes n basa a n at ufiziel (lege, dezijion di cunsëies cumenei, statut, directives lientes, y nsci inant) cun carater giuridich lient ti cunfronc de terzi.

Pert II Vision 2050+

NA GHERDĚINA UNIFICHEDA

TE GHERDĚINA NASCEL UNA NA LERCH SOZIELA Y ECONOMICA SĚULA PER I ABITANC DLA VALEDA. L CRĚSCER DI LUESC, DLA INFRASTRUTURES Y DL'AMINISTRAZIONS DLA VAL SE BASA SUN LA PARTIZION DE VALORES Y TRADIZIONS Y NA CULTURA CHE TI DEBE LERCH A DUC. TL CIAMP SOZIEL Y POLITICH VĚNIEL TE GHERDĚINA RUJENÀ TE UNA NA RUJENEDA Y NA USC SĚULA. SE METAN ADUM Y VALORISAN SI IDENTITÀ TI DAJERÀ I ABITANC DE GHERDĚINA VIJIBLTÀ A SI VALEDA TLA PROVINZIA Y ORADECÀ. TL CUER DLA DOLOMITES VĚNIEL A S' L DÉ LA CUMENANZA BENSTAJĚNTA, EFIZIENTA Y SUSTENIBLA DE GHERDĚINA.

Pert III Cuntrat per l master plan Gherdëina dl dauni

Linies directives

NA GHERDËINA UNICA

TE GHERDËINA PRUGRAMONS L SVILUP A NA MODA CHE PUDERON NCE TL DAUNÌ DÉ NA RESPOSTA A NOSC BUJËNS TL RESPET DLA POPULAZION Y DL AMBIENT NATUREL. NËUS GARANTION LA FUNDAMËNTES DE NOSTA EJISTËNZA TLA VALEDA A NA MANIERA DURËIVLA Y SUSTENIBLA: DEFENDON LA LERCH CHE IE DEBUJËN PER SVILUPÉ I NTERESC NDIVIDUEI, MA SUSTENION NCE LA CUNSCIDRAZION Y L RESPET PER NOSC PROSCIM Y NOSC AMBIENT DE VITA. CIALON SUN L POTENZIAL CULTUREL, NATUREL Y ECONOMICH DE GHERDËINA CHE VËN PURTÀ A ESPRESCION TE NOSTA TRADIZION, TE NOSC VALORES Y TE NOSTA CUNTREDA. RENFURZON NOSTA IDENTITÀ Y SE GIAURION TL MEDEMO MUMËNT AI SVILUPS NUEVES.

CHEMUNS Y CUMENANZES, PERSONES Y FIRMES DLA VALEDA IE N DUT UN. DUC ADUM SËURANTÒL LA RESPUNSABLTÀ PER SI HABITAT Y SE RËND CONT DI PONC DE FORZA CHE ON DEBERIEDA. L VIVER Y L LAURÉ ADUM IE CARATERISEI DA N SPIRT DE CUNLAURAZION Y DE STIMA REZIPROCA. I NTERESC VËN STRAVARDEI RESPETAN CHËI DI AUTRI. LA SOZIETÀ DE GHERDËINA IE PLURALISTA, DAVIERTA Y TOLERANTA: LA NTEGREA DUTA LA GRUPES Y STRAC SOZIEI Y LA IE PERCHËL CARATERISEDA DA NA GRAN COEJION SOZIELA.





A LIVEL POLITICH VËN L SVILUP Y LA DEZIIONS DELIBREDES A UNA. PER I ASPEC TECNIC Y AMINISTRATIFS IEL N SISTEM N CUMENANZA CUN I MEDEMI DËRC Y DUVIERES PER DUC.

Obietif 1



Unifiché teritorialmënter la valeda de Gherdëina

- ✦ Te Gherdëina sons duc responsabli dl daunì de nosta val.
- ✦ L carater tipich de nosc luesc y de nosta cuntredes ie la funtana de nosta identità.

Sotstrategia: Program d'azion sëuracumel

-  Definon n program d'azion sëuracumel, che vel per almanco una na legislatura, che stabilësc la tematiche sun chèles che i cin Chemuns laurerà adum tl daunì. A chësta maniera diventons plu cuscienç dla potenzialiteies y dla desfidedes che nes lieia.
-  Lauron a na maniera plu efizienta, schivan duplicazions y limitan la spëises de transazion dl'ativiteies de planificazion. Nveston l tëm্প sparanià te n pruze de planificazion culaborativa.
-  Rujenon danter nëus y se baraton ora debota la nformazions che ie debujën. Nosta ativiteies de planificazion devënta na tematica de descuscion cun duta la sozietà.
-  L Master Plan Gherdëina ie l strumënt d' atuazion dl program d'azion.

Sotstrategia: Formes de nridlamënt y tipologies dl frabiché da paur tipiches dl raion

-  Mantenion i valores n cont dla cuntreda y dl'architettura che reprejentea nosc patrimone rurel y la tradizions de nosta valeda: les refletea nosta identità.
-  Mantenion nosta architettura rurela che ie adateda al'adurvanza uriginela da paur y ie ntegrada a

na maniera armonica tla cuntreda y sun la rives.



Ndividuon la sperses te chëles che i sënies de nosta rujeneda formela y materiela carateriseda dala vita da pair ie mo scialdi presënc. Sun chësta sperses renunzioms a de gran ntervënc che muda la strutura y la tipologia de nridlamënt ejistëntes y sustenion al cuntreer l mantenimënt dl carater tipich dl luech. La mudazioms messerà tenì cont de chësc carater y miré a miuré la cundizioms de vita ejistëntes.



Per la cuestions revardëntes la "sperses sensibles" damandons la minonga de na Consulta de Gherdëina o l Cumité provinziel per la cultura dl frabiché y la cuntreda.

Sotstrategia: Ragrupamënt dla infrastructures



Cunlauron per frabiché y mantenì infrstrutures publiches sciche nce per la pité servijes publicis schivan nsci spëises che ne ie nia debujën. Chësc vel dantaldut tl setor di mplanc de furnidura y descëria dl'eghes, dl'energia y dl refudam, ma nce tl setor di njins per la telecomunicazioms y l'assistënza ala nfanzia.



Unificon prugrescivamënter i sistems infrastrukturei y la tarifes liedes limpea y se meton a una cun la istituzioms séurastajëntes. N particuler ulons nchin tl 2013 svilupé n proiet n cumenanza per regulé a na maniera unitera l smaltimënt dl refudam ti Chemuns defrënc.



Ejaminon la puscibleies de parternariat publich-privat che se presentea.

Obietif 2

Miuré la cualità dla vita

- * Miuré la trajënza y la cualità de Gherdëina coche lerch sozio-economica a bën de duc i abitanc dla valeda.
- * I abitanc de Gherdëina possa sodesfé si bujëns restan tla valeda.

Sotstrategia: Putenzië i raions da jì a pe y fé che i devënte zentrei



I zëntri y i raions da jì a pe ie l cuer de nosc luesc: tlo se porta pro nosta ativateies da uni di, tlo tulons pert ala vita publica.



Proieton chisc zëntri a na maniera che i sibe multifunzonei per sustenì y cunlië la istituzions publiches y la mprejes locales. L ie de mpurtanza per nëus mantenì te nosc paejes i servijes tipics di zëntri (posta, dutores, scolines, coes per i pitli, butëighes, restauranc, apoteches). Nsci vëniel a s'l dé lueges de vita per i abitanc de Gherdëina.



Realison sistems cun de pitla plazes y stredes, amplian nosta zones da jì a pe (sce de bujëns nce mé te cër tèmps dl ann).



Garantion ai abitanc la puscibltà de arjonjer a pe i servijes publics zentrei y i servijes de nteres generel. Per realisé chësc njinions ite zones de trafich limità tl zënter di paejes y tulon mesures sciche p.ej.: l'abolizion dla spartizion danter streda y tretuar, la ndrova de elemënc d'aredamënt urban che smendrësc l flus dl trafich (sciche salejeies, cuntenidëures, scialieres), n slune da var de persona y l azes ai zëntri regulà te cër orares. Tenion cont te na maniera particulera dla persones cun mubiltà limiteda (handicap).



Nosta zones residenzieles ie planifichedes y realisedes coche nridlamënc da jì a pe y ie mé azessibles per persones residëntes iló o ntëurvia y ulache l slune da furné ie de al plu 30 km/h.

Sotstrategia: Ti luesc devënta l raion dl ruf na luegia d'ancunteda



Fajon che l Derjon devënte azessibl y da nuzé per chi che viv ti paejes de Gherdëina. Perchèl ulons realisé dlongia ruf ora sperses recreiatives de cualità che la jënt puderà nuzé te si tēmp liede. Oradechèl vëniel nsci nce valorisà l cialé ora dl luech.



De gra ala realizazion dla linia dla ferata de Gherdëina puderà la spersa dla streda delideda dal trafich unì ntegrada tl raion dl "parch dl ruf".



Respeton i bujēns lei ala defendura dla gran eghes y renunzion a n'adurvanza recreiativa dl ruf per manteni la cualità dl'ega.

Sotstrategia: "Porc vërc"



Renunzion a fé su nridlamēnc delà dl raion d'espanscion y crion "porc vërc" che spartēsc y urganisea la lerch dejëujan tl medemo mumēt na funzion ecologica y recreiativa. Zaron ju la frabiches ejistēntes che ne vën nia nuzedes y defendon chèles nuzedes.



Ne ulon nia che l vënie a s' l dé n nridlamēt che taca adum tres la valeda: se nuzon di "porc vërc" per manteni na spartizion danter n paes y l auter.



Per schivé nridlamēnc cumpac che taca adum crions porc vërc cun funzion recreiativa per la popolazion dla valeda (sperses per l tēmp liede) ulache l vën lascià pro vel mplant dal sport per l tēmp liede.



Tres i porc vërc giapa la flora y la fauna de Gherdëina n teritore prijà y a chësta moda mantenions l barat ecologich danter i doi custons dla valeda.

Sotstrategia: Funzions mescededes tl zënter di paejes



Cialon de ne realisé deguna monostrutures architetoniches y economiches tl zënter de nosc luesc y lascion pro, al cuntrer, adurvanzes defrēntes dla lerch. A chësta maniera garantions na vela rica de bēns y servijes per la popolazion y ti dajon vivanda al luech schivan l vënie a s' l dé trafich che

ne ie nia debujën tla periferies. Proieton nosta strutures residenziales a na moda che la infrastrutures plu mpurtantes y i servijes d'ujinanza posse unì arjonc a pe.



Son dla minonga che la strutures tl zënter di paejes posse unì destineses a ti dé lerch per ativateies de cumerz ala menuda y al artejanat, per chëles che l ie n vantajes sce la jënt possa se muever a pe, y servijes n generel. Ora che a na mescedanza urizontela pensons nce a n mescedanza verticala.

Sotstrategia: Sperses per l sport da d'inviern



Nchin tl 2016 ulons ndividué duta la infrastrutures per l sport da d'inviern che ie de mpurtanza per Gherdëina y sun chëles che i Chemuns tulerà dezijions acurdedes. Per chësta infrastrutures destinons raions te de bona pozisions, che ie da arjonjer saurì cun i mesuns publics, y che cunlion.



Se nuzon dla strutures ejistëntes coche referimënt y cun la sperses per l sport da d'inviern cialons de respunder ai bujëns de duta la valeda. Nsci arbassons la spëises y schivons che les ne vën nia adurvedes assé. Cialon che i nvestimënc di Chemuns vënie partii su a na maniera balanzeda.

Obietif 3

Mantenì la cuntreda naturela

- * La natura vën defenduda coche capital de gran valor per la cualità de nosta vita.
- * La persones se nuza dla natura y dla cuntreda a na moda che l habitat dla plantes y di tieres vënie mantenì per n tēmp lonch.

Sotstrategia: La natura dantaldut



Dedora dl raion nridlà planificà ti dajons la prezedenza ala natura y ai bujëns dla flora y dla fauna. Nosta adurvanza dla cuntreda ie sometuda ai bujëns dla natura.



Se nuzon dla puscibleies che nes vën pitedes dal fat che la Dolomites ie unides numinedes Patrimone naturel dla Umanità UNESCO per defēder stabilmēter la cualità dla natura y dla cuntreda de nosta montes.



Nëus lauron acioche l Saslonch, l Sasplat, Mëisules y d'autri raions de mpurtanza vënie sometui a defendura. Nchin tl 2016 muessa almanco la grupa dl Sela y dl Saslonch vester desseniei ite coche parcs naturei a na moda da furmé na pert ntegrēnta dla Dolomites Patrimone naturel dla Umanità UNESCO.



Stajon for de verdia che la natura y la cuntreda vënie mantenides te dut l teritore y tl cajo de viulazion udons danora mesures de cumpensazion adatedes.

Sotstrategia: Relevamēt dla zones potenzielles de nridlamēt te n luech



Nchin tl 2013 cialons de relevé ciuni che ie i teraces a despusizion ti Chemuns per i proiec de costruzion tl dauni y i senion coche “sperses de nridlamënt”. Fajeron n relevamënt dla sperses che pudëssa potenzialmënter tl dauni unì destinesdes a nridlamënc, infrastructures y sperses vërdes. La sperses da garat unirà ejaminedes tenian cont de si adurvanza per ampliamënc dl nridlamënt tl dauni.

Sotstrategia: Defininé i raions d’espansion per l svilup di nridlamënc



Per manteni l carater cumpat de nosc nridlamënc y schivé che la cuntreda vënie manaceda dala despersion dl nridlà cialons che l svilup dl abitat se dejëuje de viers di zëntri.



Definon (nchin tl 2016) l perimeter te chël che n nridlamënt l possa se svilupé. Proieton i cunfins dl nridlamënt, acioche i paejes posse vester nluegei armonicamënter tla cuntreda y l sibe n cajo puscibl schivé periculi naturei.



Lascion pro che l vënie mé realisà nridlamënc sun l fonz dla valeda sparaniat nsci i cosc per lëures d’urbanisazion y infrastructures puech efientes y che ne ie nia debujën.

Sotstrategia: Nspessé la zona de nridlamënt che ie bele



Sparaniat la ressurses de grunt limitedes de Gherdëina. Chësc uel di che dan realisé frabiches nueves sun teraces liedesc se nuzons de duta la cubatura che on a despusizion ti luesc nstësc, nce mudan la destinazion d’adurvanza y revitalisan la la frabiches ejistëntes che ne vën nia nuzedes. A chësta moda pudons sparanië pra i cosc d’urbanisazion y pité tl medemo mumënt servijes publics te raions zentrei a bën di abitanc dla valeda. Per la desiniazion dla sperses adatedes se nuzons dla lista dla sperses de nridlamënt nunzieda dessëura.



Cialon che la strutura dl nridlamënt dl paesch devënte plu spëssa a na moda da ne desnaturé no l carater y l cialé ora dl luech. Ora che na cubatura te na mesura adateda preudons nce assé sperses daviertes ti luesc nstësc, cun na funziun recreiativa per i abitanc. Schivon de pesé dantaldut sun la fasces dla popolazion che à n davani bas.

Tl respet dla lege urbanistica provinziela mirons a chisc valores de spessënza abitativa:

Zënter storich:

- Avané la spessënza de nridlamënt dl 5% cun la recupereda dla cubatura

Sperses de completamënt:

- Avanamënt dla spessënza atuela (danter l 1,00 y 2,50) dl 30 %, ma zënza superé la spessënza mascima de 2,5;
- L 60% dla cubatura de njonta ie resserveda al frabiché abitatif per pité cuatieres ala popolazion dl luech;
- L 30% dla sperses da destiné a adurvanza nueva ne daussa nia unì frabichedes pro.



Zones d'espansion

- N avanamënt dla spessënza atuela dl 20%, ma zënza che l vënie superà la spessënza mascima de 2,5;
- Almanco l 20% dla spersa desinieda muessa resté lerch davierta da nverdì.

Obietif 4

Garantì l balanz soziel

- * L ie na coesion soziela danter i abitanc dla valeda che god dla medema cundizions de vita y pusciblteies de svilup.
- * I abitanc, dantaldut la families jëunes, à a despusizion assé cuatieres a priejes azessibli.

Sotstrategia: Cumpensazion soziela tl cajo de nvestimënc privac



Adum cun i nvestëures privac se cruzions che l sibe na cumpensazion soziela pra chëla scumenciadives che fossa scenó mé de vantaje per i sogec privac. Fajon a na maniera che chësta cumpensazion sibe tresudënta per duta la pertes nteressedes.



Se nuzon dl strumënt dla urbanistica cuntratuela acioche chisc proiec sibe de vantaje per duta la cumenanza.

Duc i Chemuns dla valeda stabilësc deberieda na lingia de criteres per determiné la forma o la mesura de chësc cuntribut per l bën dla cumenanza. N valgun ejëmpli:

- 10% dl valor dl nvestimënt;
- destinazion dl 10% dla cubatura frabicheda a adurvanza o bën public;
- lista a nivel de valeda, che cuntën i nvestimënc, la infrastructures y i proiec da nvië via deberieda, la strutures y i mplanc da gestì a chëi che l pudëssa unì destinà i cuntribuc;
- lista a nivel de Chemun, che cuntën i nvestimënc, la infrastructures y i proiec che ie debujën, la strutures y i mplanc da gestì, a chëi che l pudëssa unì destinà i cuntribuc.

La mesura dl cuntribut ie defineda n relacion ala situazion finanziaria dl tituler dl proiet y al davani privat che n se aspieta.

Sotstrategia: Sistem de cuntrol per l'cunvenziunamënt



Ulon vester autorisei a fé cunvenziunamënc a na moda da pudèi i adaté ala situaziunspezifiches de nosc Chemuns y ampliè nsci nosc ciamp d'azion.



Meton su n organism de cuntrol ndependënt a nivel de valeda che à la ncëria de verifiché che l'cunvenziunamënt dla frabiches nueves vënie respetà. De chësc organism fej i cin Chemuns pert te na maniera paritetica.



Doi iedesc al ann prejentons a chësc organism de cuntrol na relazion sun la tresudënza per uni Chemun, te chëla che l'ie repurtà l'numer di cuntroi y si "follow up", i caji de viulazion dla cunvenzion y la strafonga curespundënta.

Obietif 5

N raion da jì cun i schi de cualità

- * Gherdëina pieta ai ghesc l miëur raion da schi cun i schi dla Elpes.
- * L raion da jì cun i schi Gherdëina-Mont de Sëuc ie njinià ite scialdi bën sibe a nivel dl atrezamënt tecnich sibe a nivel tecnich ambientel.

Sotstrategia: Miuramënt cualitatif di raions da jì cun i schi



Ti cunfins dla spersa dessenieda ite tl Plan de setor nuef di purtoies da jì cun i schi lascions pro l spustamënt y l livelamënt de pistes che ie bele y pitli cunliamënc, sce chësc porta pro al miuramënt cualitatif di raions da jì cun i schi. Dedora dla rë ejistënta renunzioms a fé deplù purtoies y mplanc portamont nueves. L fajon dantaldut per sodesfé i recuisic de n turism sustenibl tla Dolomites, Patrimone naturel dla Umanità **UNESCO**.



A nivel tecnich-sciistich se cunzentrea nosc svilup sun l miuramënt dla cualità dl atrezamënt te nosc raions da jì cun i schi ctres nvestimënc curespondënc ti mplanc y tla cualità dl servisc.



Ncurajon dantaldut i nvestimënc che mira a svilupé i raions da jì cun i schi de Gherdëina ti dajan preferënza ai servijes dedichei ala families y ai mutons.

Sotstrategia: Cunliamënt Gherdëina–Mont de Sëuc



Studion n cunliamënt danter i raions da jì cun i schi de Gherdëina y chël de Mont de Sëuc. A chësc fin metons su na grupa de lëur sëuracumenela che tòle ite i purtadëures de nteres plu

mpurtanc che nciarion de ejaminé y valuté duta l'auternatives puscibles da uni pont d'ududa y te uni direzion.



Tulon ite la populazion de duta la valeda tl pruzes de dezizion n cont dl cunliamënt danter i raions da jì cun i schì de Gherdëina y de Mont de Sëuc.



I criteres de valutazion determinënc per nëus ie, da una pert, la puscibltà de ntegré la linia dla ferata de Gherdëina te n proiet de cunliamënt eventuel, dal'otra pert, la cumpatibltà dl proiet cun i bujëns de n turism sustenibl tla Dolomites, Patrimone naturel dla Umanità UNESCO.

Sotstrategia: Cunliamënt danter la stazions da jì cun i schi a val



Cunlion la stazions a val di mplanc da jì cun i schi a na moda che l ne sibe nia de bujën de tò l auto per i spustamënc. La cundizion de basa ie chëla de proieté la linia dla ferata de Gherdëina cun si fermedes. Nsci pitons dantaldut ai schiadëures che vën per n di la puscibltà de arjonjer i raions da jì cun i schì cun i mesuns publics.



L cunliamënt danter la stazions a val muessa vester zënza mpedimënc. Pra la stazions svilupons y cunzentrums i servijes y la pustazions d'assistënza, acioche i schiadëures les posse arjonjer zënza messei tò l auto.

VARIETÀ TE GHERDËINA

LA PLURALITÀ LINGUISTICA, CULTURELA Y ECONOMICA IE NA CARATERISTICA CHE DEFRENZIEA GHERDËINA DA D'AUTRI LUESC. LA SOZIETÀ IE DAVIERTA Y VËIJ TL PLURALISM N VANTAJE.

TE GHERDËINA DAJONS FORMA A N SVILUP CHE PIETA PUSCIBLTEIES DE CHERSCIUDA A DUTA LA GRUPES SOZIELES Y ALA MPREJES DLA VALEDA. LA PERSONES POSSA TE SI DEFRËNZIA Y NDIVIDUALITÀ REALISÉ SI TRAVERC Y PROIEC DE VITA. L'ECONOMIA DE GHERDËINA PIETA DE PLU STIERES TI TRËI SETORES ECONOMICS PRINZIPIEI Y TE TRUOP D'AUTRI SETORES. A CHËSTA MODA MËTELA A DESPUSIZION DI ABITANC DLA VALEDA STIERES TE TËMPS DE CRISA Y LA STIMULEA LA INUVAZION DLA MPREJES Y LA CULABORAZION DANTER LA MPREJES.

L'ECONOMIA DLA VALEDA SE STIZA SUN DE PLU SEVES Y CHËSC LA FEJ MANCO ZITIA TI CUNFRONC DLA CRISA. DE GRA A CHËSTA DEFRENZIAZION POSSA L'AZIENDES PITÉ POSC DE LËUR PER CUALIFCAZIONS SCIALDI DEFRËNTES. DUC LËURA.

L TURISM IE INANT N SETOR DE MPURTANZA CHE TI DÀ MPULSC AL'ECONOMIA LOCALA. DO LA CRISES GLOBALES (CHE À TUCÀ L'ECONOMIA, LA CUNTREDA Y LA SOZIETÀ) IESEN STAC BONI DE SVILUPÉ AUTERNATIVES AL TURISM, MA NCE AUTERNATIVES CHE FUNZIONEA TL CIAMP DL TURISM. L IE DANTALDUT LA SAJONS DANTERITE CHE PRUFITEA DE CHËSC CUNZET.

CIALAN DE MIURÉ FOR DE PLU LA INFRASTRUTURES SUSTËN L SETOR PUBLICH LA CUNDIZIONS CHEDER PER L'AZIENDES Y PORTA PRO NSCI DASSËNN AL SUZES DE GHERDËINA TLA DESFIDEDA CUMPETITIVA SÉURAREGIUNELA Y INTERNAZIUNELA.

Obietif 6

Cualità mpede cuantità

- * La strategia de svilup de nosta val ne mira nia a na chersciuda a duc i cosc, ma la ti à crëta a n daunì sun la fundamëntes dla cualità.
- * La populazion se rënd cont dl'unizità de nosta valeda y la cunscidrea cun cuescienza i potenziai liei a chësta unizità y i periculi de la ruiné liei limpea.

Sotstrategia: Stop al avanamënt di liec y limitazion dla chersciuda cualitativa



La valeda à arjont l lim de suportazion di flusc turistics y dl trafich y la nviëia via n mudamënt struturèl per passé da na chersciuda cuantitativa a na cualitativa.



Nchin tl 2013 identificons la strutures turistics de majera mpurtanza per duta la valeda che ie te uni cajo da mantenì. Chëstes messerà unì evidenziedes te nosc strumënc urbanistics.



Renunzion a amplië mo deplù la infrastrutres d'albierch y de turism y miuron la cualità de chèl che ie bele a despusizion. Perchèl defrenzioms dantaldut l'ufiarta turistica y crion prupostes che tira adalersch dantaldut tla sajon bassa categories defrëntes de turisc.



L svilup cualitativ vën nce arjont crian na rë de infrastrutres turistics y de servijes assoziei. Cunlauron cun d'autri setores, acioche l turism posse purté pro ala inuvasion y ala cumpetitivà dl sistem economic n tier de Gherdëina.



l Chemuns de Sëlva, Santa Crestina, Urtijëi y la frazioms ladines dl Chemun de Ciastel lëura ora n cumenanza nchin tl 2014 n plan de svilup turistic che tënne cont dla mires singules che ie da arjonjer ti luesc defrënc y che determinëie l numer mascim de liec per duta la valeda. Chësc unirà ntendù sciche na "borsa dla despuniblteies". l criteres cualitatives ie chèi de majera mpurtanza.

Sotstrategia: Zënter economicich intersetoriei a Puntives



Pra la ntreda dla valeda, a Puntives, realisons te na posizion zentrela (nchin tl 2020) n “*business centre*” n cumenanza y intersetoriei. Te na luegia zentrela dla val destinons sperses per nridlamënc produtifs y comerziei per manteni posc de lëur y n crië de nueves.



La luegia sarà cunlieda a n ncrëusc zentrel dla linia dla ferata de Gherdëina y Puntives deventerà la luegia economica zentrela dla val. L unirà metù verda a na maniera particulera ala defendura dai periculi naturei. Per cie che reverda la proietazion architetonica unirà l Cumité provinziel per la cultura dl frabiché y la cuntreda damandà de purté a esprescion si minonga.



La sperses ndividuedes a Puntives ie destinesdes dantaldut al svilup y al ampliament de mprejes locales.

Sotstrategia: Restruturazion dla zones per nridlamënc produtifs atueles



Tulan bel plan ora dala planificazion urbanistica la sperses produtives che ne ie giut alalongia nia unides nuzedes ti luesc singui y mudon si destinazion d’adurvanza fajan dainora sperses residenzieles o sperses per nridlamënc dl terzier. Cunzentron i nridlamënc produtifs dl daunì te cater lueges de mpurtanza per duta la val che sibe saurides da arjonjer (Plan, Santa Crestina, Urtijëi, Puntives y Laion). Pra chësta restruturazion toca per nëus nce l mudament dla destinazion d’adurvanza dla cubatura ejistënta che ie tl mumënt ueta.



(Nchin tl 2016) laurons ora n plan per la sperses sëuracumeneles cun adurvanza comerziela, te chèl che definon i aspec dla gestion de chësta zones y dla cumpensazion finanziaria danter i Chemuns.



Tl cajo de na mudazion dla destinazion d’adurvanza dla sperses produtives atueles defendons l’aziendes ejistëntes te si dimenscion da sën; chësc vel mé per i patrons atuei.



Tl cajo de mudazions a d'otra destinazions d'adurvanza verificons la puscibltà de smendré la cubatura per adaté la zones dal pont d'ududa dl frabicà al cialé ora di paejes (sauridé si ntegrazion armonica tl cuntrest urban di paejes). A chësc fin damandons l Cunité provinziel per la cultura dl frabiché y la cuntreda de purté a esprescion si minonga.

Sotstrategia: Plan de svilup turistich Laion



L Chemun de Laion, a una cun i autri Chemuns, lëura ora (nchin tl 2014) n plan de svilup turistich che vëije danora na chersciuda limiteda baseda sun na formula rezetiva cumpatibla cun l carater da paur dl Chemun.



Cun l plan de svilup turistich de Laion sustenions n turism sustenibl, adressà ala families y bon de generé davani njuntà per nosc luesc da paur.



A Laion ncurajons n svilup turistich che passenëie pra la imaja de na “destinazion turistica sustenibla” che l Chemun y la valeda uel dé inant. L “turism zënza auto” ie la esprescion plu mpurtanta de chësta mpustazion.



Dajon gran mpurtanza a nosta cuntreda culturela bën cureda y al carater da paur de nosc luesc: pansan ala infrastructures nueves ie chësc n critere de valutazion de gran mpurtanza.



Nes destanzion aposta dala tendënzes dl turism de massa (cualitatif) per jì tla direzion de n turism individuel auternatif che conta sun la cualità.

Obietif 7

Funtanes d'energia autnatives

- ✳ I Chemuns de Gherdëina ie boni de curì si bujën de energia cun funtanes d'energia renuables locales.
- ✳ I abitanc de Gherdëina possa se nuzé dl'energia a priejes da fundamënt.

Sotstrategia: Defendura dl clima y plan de sparani d'energia



Nchin tl 2015 laurons ora n Plan per la defendura dl clima y l sparani d'energia coche udù danora dala "Strategia per il Tlima Energia-Südtirol 2050", njunteda al Plan provinziel de svilup y coordinamënt teritorial (LEROP). Meton l azënt dantaldut sun l refurnimënt d'energia y sun la recualificazion o otimisazion energetica dla frabiches publiches. L Plan reverderà duta la valeda y l sarà l prim tl Südtirol. Ntegron l Plan te nosc program d'azion intercumenel per l mandat legislatif atuel.

Sotstrategia: Biomassa



Per sodesfé la dumanda locala d'energia purvons ora lueges autnatives per la zentreles a biomassa che produj lectrisc per la families y per i mplanc ndustriei y cumerziei di Chemuns dla val. Una na cundizion che meton dant ie che la zentreles a biomassa nuze la biomassa dl luech che vën da Gherdëina y dal Südtirol. A chësta moda sustenions l'economia a cërtil stlut local.

Sotstrategia: Crissa de energies autnatives



N culaborazion cun i istituc de nrescida y la scumenciadives ejistëntes tl Südtirol sustenions la costituzion de na grupa de nrescida a Laion che se débe jù cun funtanes d'energia renuvables y auternatives. Se nuzon dla imaja positiva che Laion à sapù se davanië ti ultimi ani coche Chemun cun na strategia energetica inuvativa y dajon atuazion ala Strategia per l Tlima Energia-Südtirol 2050 dl LEROP.

PUECH TRAFICH TE GHERDËINA

TE GHERDËINA PROIETONS N SVILUP CHE SMENDRËSC LA DEPENDËNZA DLA PERSONES, SIBE RESIDËNTES SIBE GHESĆ, DAL TRASPORT INDIVIDUEL Y DAI COMBUSTIBLI FOSSII CUNSERVAN MPÒ L MEDEMO LEVEL DE MUBILTÀ ATUELA. A CHËSTA MANIERA SARONS BONI DE RËNDER INÒ DESPUNIBLES Y DA NUZÉ GRAN PARTES DLA LERCH PUBLICA SMENDRAN NCE ZESURES Y RËMS. DE GRA A N MËNDER MPAZIAMËNT ACUSTICH Y ATMOSFERICH ARAN TI PAEJES NA SCIALDI MIËURA CUALITÀ RESIDENZIELA Y AMBIENTELA. NOSTA ARCHITETURA TRADIZIUNELA Y L'UNIZITÀ DE NOSTA CUNTREDA SARÀ INÒ ELEMËNC FORMAI CARATERISTICS DE NOSC RAION. LA LERCH PUBLICA SPIDLEA INÒ LA SOZIETÀ Y LA CULTURA DLA VAL.

GHERDËINA, DANTALDUT I TERITORES CUMENEI, IE N GRAN PERT LIEDESC DAL TRAFICH PERVIA DE NA UFIERTA TRAJËNTA DL TRASPORT PUBLICH. TÌ PONC DE NCRËUSC POSSEN PASSÉ TE PUEC MENCUC DA N MESUN DE TRASPORT AL AUTER (STLUTES ITE LA FURNADOIES). L TRAFICH DE TRANSIT VËN REGULÀ TRES MECANISMS FINANZIERES Y DE ORAR.

Obietif 8

Smendramënt dl trafich

- * Gherdëina disciplina l volum dl trafich a bën de na miëura cualità ambientela y de vita per la persones.
- * Sce l trafich coche carateristica prevalënta de Gherdëina vën scunjarà miurea la cualità dla spersa publica y dla cuntreda.

Sotstrategia: Completamënt dla zircunvalazions di paejes



Completon la zircunvalazions che mancia mo, a na moda da scunjaré l trafich de transit dai zëntri di luisc. Nsci recuperons sperses te pozisions zentreles che possa unì metudes a despuzion de chi che ne tòl nia pert al trafich motorisà (chi che va a pe o cun la roda). Tl proieté la lerch publica ti dajons nsci plu ahta ai bujëns y ala ghiranzes de chisc utënc. Tramudon l zënter di paejes te zones de trafich limità.



A uni moda reprejentea chësta mesura per nëus na soluzion transitora nchin che l unirà realisà la linia dla ferata de Gherdëina che ressolverà a na maniera definitiva l problem dl trafich te nosta valeda.

Sotstrategia: Limitazion dl trafich sun i pasc



Limiton l trafich sun nosc jëufs dolomitics che ie tan sensibli: nchin tl 2014 metons su na pruibizion de transit a tëmper y destinons i jëufs a chëi dala rodes.

Sotstrategia: Limitazion de furné per i motores



Smendron l'emissions de fuera y de sustanzas ajiëntes gaujedes dal trafich di motores metan su na limitazion dl transit a cër tèmps sun la stredes di jëufs. A chësta maniera garantions l'azessibltà ai Chemuns, ma limitons l trafich de transit.



La pruibizion de transit valerà per ot ëura ntan l di y la unirà adateda ala sajons y ai tèmps defrënc dl ann.

Obietif 9

Urganisé l trafich a na moda ecocompatibla

- ★ I abitanc y i ghesç de Gherdëina possa sodesfé si bujëns de mubiltà a na maniera sustenibla y ecocompatibla.

Sotstrategia: La linia dla ferata de Gherdëina



Purton inant y se damandon n sistem de trasport publich sustenibl y ecocompatibl che garantèsce ai abitanc y ai ghesç na bona mubiltà te duta la valeda.



(Nchin tl 2016) fajerons n stude de cie che se lascia fé n cont di mesuns de trasport y l percurs de chisc mesuns, y fisson n tēmp realistich per l'atuazion dl'auternatives defrēntes dla linia dla ferata de Gherdëina.



Udon danora ciunes che sarà la sperses debujën per chësc sistem de trasport y nen tenion cont pra l'ativiteies de planificazion y de finanziaimēt dl daunì. Cun chësc proiet nvestons diretamēnter tla cualità dla vita y dl ambient de nosc cunzitadins y dla generazions che vën docà.



Realison la linia dla ferata de Gherdëina te doi fases: per prim ejaminons l'auternatives danter Puntives y Plan; dadedò cunlions l sistem de trasport publich ai autri sistems dla Provinzia tla Val dl Isarch y Pruca y ala valedes dla Dolomites ntëurvia.

Cun la linia dla ferata de Gherdëina ti jons ancontra a chisc bujëns:



- Cunliamēt modern, a slune y ecologich al trasport sēuralocal, dantaldut per i penduleres
- Azessibltà ai paejes y ai servijes plu mpurtanc dla valeda
- Azessibltà dla destinazion turistica
- Cunliamēt dla stazions di mplanc da jì cun i schi cun mesuns ecologics

Sotstrategia: Sistem de trasport public local ntracumenel



Ti paejes realisons n sistem de trasport public che sauridea la renunzia al auto sibe tl cajo de bur' tëmp sibe d'inviern y nce per la persones cun na mubiltà limiteda. Cunsidron perchël cuzec defrënc de mubiltà: servijes shuttle per i singui, *car sharing* cun auti ibric o a lectrisc, rodes a lectrisc, y nsci inant.



Garanton a nosc zitadins y ai ghesc n sistem de trasport local efizient per la destanzas curtes ti paejes nstësc, tenian cont a na maniera particulera di bujëns dla families y dla persones de tëmp.



Proieton l Plan de mubiltà l fajan jì a una cun l svilup dla linia dla ferata de Gherdëina a na moda che la fermedes dla ferata sibe nluagedes te pozisions zentrees di Chemuns y cun la funzion de ncrëujes multomodai tl sistem. A chësc fin metons a jì l "*Grödentakt*", n sistem de trasport ritmà, che garantësc la puscibltà de passè da n mesun de trasport al auter zënza tëmps da aspitè. Ti ponc de ncrëusc (intermodai) udons danora infrastructures y servijes adatei per i abitanc dla val (mprëst de rodes, plazes da parché i auti (cun stangia da stlù jù), rampes, stazions de servisc ...).



L cunliamënt al sistem de trasport public ie na cundizion per la destinazion de sperses nueves de nridlamënt tla planificazion locala.

Sotstrategia: Ampliamënt dla rë di percursc da jì cun la rodes y a pe



Te Gherdëina dajons n valor nuef ala mubiltà pedunela y cun la roda cialan de crië na rë ntegrada de percursc per jì cun la roda y a pe. Chësta rë cunliëia sperses residenzieles y structures rezetives cun destinazions defrëntes ti luesc y dedora dai luesc (scoles, butëighes, atrazions).



Definon nosta pozicion tl setor turistic dla doi rodes cunlauran cun la valedes ujines per ncurajé l'adurvanza dla stredes sun i jëufs coche struttura per la rodes.



Pitan servijes de njonta y assistënza ala mubiltà per chëi dla rodes y che va a pe (distributëures automatics de pneumatics per la rodes, lueges de restaurazion, lueges da se fermé) crions n valor njuntà y tramudons la infrastruttura scëmpla te n prodot de cunsum de gran trajënza.

Sotstrategia: Zënter per la mubiltà de Puntives-Pruca



Puntives ie per nëus n pont zentrel d'azes ala valeda. Tl cheder dla realisazion dla ferata de Gherdëina devënta Puntives de gran mpurtanza, ajache da ilò pierà via la prima pert di lëures. Puntives ie l pont de ncrëusc zentrel intermodal dal mesun de trasport privat a chël publich. L ie l pont de ncrëusc per la rë de trasport per ruvé tla valeda y se n jì dala valeda.




Per pië su i flusc dl trafich de mesuns de trasport ndividuei ulons realisé na cumpëida adateda de plazes dai auti, dantaldut sota tiera.




A Puntives ti pitons ai passajires y al publich duta la nformazions sun i servijes de mubiltà dla valeda (*Grödentakt*, rë de percursc da jì cun la roda y a pe, servijes de mprëst de rodes, auti a lectricisc).

Pert IV master plan

4 Na Gherdëina unica



5 Varietà te Gherdëina



VIEL FÄLTIGES GRÖDEN

- | | |
|---|--|
| <p>Lokale Identität</p> <ul style="list-style-type: none">  Energie  Holz  Bildung  Sport | <ul style="list-style-type: none">  Übergreifendes Wirtschaftszentrum Pontives  Forschung erneuerbare Energien Lajen  Funktionale Mischung in den Ortskernen  Ländliche, ortstypische Siedlungsformen und Bautypologien  Ökologische Grünkorridore  Wintersportzonen |
|---|--|

gröden - vielfalt statt einfalt



VISION
MASTERPLAN
 Gröden Gherdëina Gardena

Diese Karte visualisiert das Leitbild. Die Signaturen stellen jedoch keine Verortung oder planerische Festlegung dar.

Kartengrundlage: Digitales Orthofoto 2006
 Autonome Provinz Bozen - Amt für Überörtliche Raumordnung
 Terraltaly™ - © Compagnia Generale Riposarecree

6 Puech trafich te Gherdëina

